

Universal Declaration of Human Rights - Occitan (Francoprovençal, Valais)

© 1996 – 2009 The Office of the High Commissioner for Human Rights

This HTML version prepared by the *UDHR in Unicode* project, <http://www.unicode.org/udhr>.

Dèclarachion di drouê de l'ómó por tui lè pa-i dou moundo.

Document traduit en patois d'Héremence par Alphonse Dayer avec la collaboration de Narcisse Seppey.

Héremence février 2014

Introduccion

In tenien countó ke le respè de la degnetà de l'ómó apartin à to lo moundo chou la tèrra, avoué lè mémo drouê, è ke pouon pâ èthre sèdà, fé la fondachion de la libèrtà, de la jiosteuce è de la pé dou moundo.

In tenien countó ke le mèconièchance è le façon de mefrijieu lè drouê de l'ómó i'an menà à de j'acto de barbaric ke reboúzon la couchieince di moundó è ke le néchance d'oun moundo anvoueu lè zin charin libré de cothèrjieu è de creire, libèrà de la pouire è de la mijère, i'a eithà anouchia comin le pló àta aspirachion de l'ómó.

In tenien countó ke i'è th'important ke lè drouê de l'ómó fochan protèjia pèr oun réjime de drouê pórke l'ómó chei pâ countrin à la fin, à chè revoltà countre la tiranic è l'oprechion.

In tenien countó ke i'è th'important d'incorajieu lo développèmin di relachion amicale intre nachion.

In tenien countó ke din la louè de fondachion (charte), lè zin di Nachion Rèoneite i'an proclamà à noé lóou foué in lè drouê prinsepà de l'ómó, in la degnetà è la valóou de la pèrchon-na, din l'égalità di drouê di j'ómó é di fèmale, è ke chè chon dèclarà fermó a favorijieu lo progrès social è a instalà de mi bône coundichion de via in pèr óna mi graucha libèrtà.

In tenien countó ke lè j'Eta couchô chè chon ingajia à achiourieu in coopèrin aou l'organizachion di Nachion Rèoneite, lo respè coumplè di drouê de l'ómó è di libèrtà fondamentàle.

In tenien countó k'óna counsepchion cómona de hlóou drouê è libèrtà i'è de la pló àta importance por impli plein-namin chè ingazèmin

L'assemblée gènèrala proclianme la prèjinta Dèclarachion di drouê de l'ómó por tui lè pa-i dou moundó comin étan le mèillóou tsauja à fère pèr tui lè pópól è tóte lè nachion pórke tóte lè zin è tóte lè société óchan sta Dèclarachion tolon in l'espric, fajichan l'infô, pèr l'insènièmin è l'edócachion, de développà lo respè de hlóou drouê è libèrtà è d'achiourieu, pè de mejóre de progrè d'ordre nachional è internachional, la rèconièchance è l'aplecachion coumplèta è veretàbla, tan premieu lè pópólachion di j'Eta mimbros lóou mémó kè premieu hleu ke chon rêjicite pèr lóouc.

Artecló premieu 1

Tui lè jètre humain néchon libro è pary in degnetà é in drouê. Chon reijonâbló è de couchieince è deivouon âzie lè j'oun vi j'avi di j'âtró in pèr oun espri de fraternità

Artecló dau 2

Tsecoun pou chè prévâli de tui lè drouê è de tóte lè libèrtà proclamà in sta Déclarachion, chin ócóna distinchion, de rache, de cólóou, de sèxe, de linvoua, de relijion, d'opinion poleteca ou bïn de tóte j'âtre j'opinion d'orejena nachionala ou sociala, de fórtóna, de néchance ou bïn de tóte j'âtre setoachion

In plò charè pâ fé dè distinchion fondâye chou lo statu poletecó, zóredécó ou internachional dou pa-ic ou dè l'indrei don óna pèrchon-na i'è rechortechinta, ke ché pa-ic ou ché indrei indépèndan, chou tótèlla, pâ libró ou bïn choumetou a óna lemetachion dè souverènètâ.

Artecló tre 3

Tsecoun i'a drouê à la via, à la libèrtâ è à la proteichion dè cha pèrchon-na.

Artecló katró 4

Nioun charè tenou in esclave ni in oblegachion ; l'èsclavâzo è le profiè di j'èslâve i'è dèfindouc in tóte chè fórme.

Artecló sîn 5

Nioun charè choumetou à la tortóra, ni à dè peïn-ne ou dè trètèmin mèchien, inhumain ou dègradin.

Artecló chiche 6

Tsecoun i'a lo drouê à la rèconièchance pèrtot dè cha pèrsonalidé ke relive dou drouê.

Artecló chat 7

Tui ch'on pary dèan la louê è i'an lo drouê chin distinchion à la méma proteichion dè la louê. Tui i'an drouê à la méma proteichion countre tóte discriminachion ke violèrei la prèjinta Dèclarachion è topary countre tóte provocachion à óna tèlla descremenachion.

Artecló ouèt 8

Tóta pèrchon-na i'a lo drouê dè chè plindre dèan la zóredichion nachionala compètante countre lè j'actó ke violon lè drouê dè fon ke li chon recoúgnou pè la constetóchion è pèr la louê.

Artecló nouú 9

Nioun pou éthre arèthâ, impreijonâ, tsachia dou pa-ic, arbitrêramin.

Artecló jieu 10

Tota pèrchon-na i'a drouê in tota égalitâ, a kè cha cauja chei avouicha d'óna façon jíosta è poublic pèr oun trebónal indépèndan è impartchiâbló, ke decedèrè, chei dè chè drouê è óbligachion, chei dè la conformitâ ou drouê dè tóte acoujachion in matire pénale dirijieite coute lieic.

Artecló ounze 11

1. Tata pèrchon-na acaujâye d'oun acto pónècheibló iè sensée éthre chin fauta por autan ke i'è pâ proâ pèr la louê, dou tin d'oun prossè poubleuco ânvoueu tóte lè garantie po cha dèfinse li en eithâye grinteite.

2. Nioun charè countanâ po dè j'achion ou bïn dè j'omechion ke, ou moman ke i'an eithâ coumetoueu, iran pâ pónècheible d'après lo drouê nachional ou internachional. Topary, charè pâ infleja dè peïn-ne mi forte ke hleu k'iran aplecâye ou moman ke le fauta i'a eithâye comètoua.

Artecló doze 12

I'è dèfindou d'allâ ch'in-mèlà chin reijon dè la via dè tsecoun, dè cha fameuille, dè ânvoueu eithe, di leutre ke rechei ou bïn k'invaue. I'è dèfindou dè mètre a mâ à choun onóou è à cha repótachion. Tota pèrchon-na ia drouê à la proteichion dè la louê countre tóte hleu maude.

Artecló trèze 13

1. Tota pèrchon-na ia lo drouê dè voyajieu libramin è dè choeiji choun indrei por eithâ in pèr oun Eta.
2. Tota pèrchon-na ia lo drouê dè kitâ to pa-ic, topary lo chió, è dè tornâ in choun pa-ic.

Artecló katôje 14

1. In ca dè persecochion, tota pèrchon-na ia lo drouê dè tsercâ oun recoeic è dè póei chè retóoudic in pèr oun àtre pa-ic.
2. Ché drouê pouî pâ êthre dèmandâ in ca dè poursuite réèlamin fondâye chou r'oun mâ dè drouê comoun ou bîn chou dè coumportèmin countrêro ou but è i principe di Nachion Rèôneite.

Artecló kînze 15

1. Tsecoun ia drouê à óna nachionalitâ
2. Oun pouî pâ prevâ nioun dè cha nachionalitâ, ni dou drouê dè tsanjieu dè nachionalitâ

Artecló chèze 16

1. A bécau ke i'an l'âjió, l'ómó è le fèmalâ, chin ócona restrichion dè rache, dè nachionalitâ ou dè relijion, i'an drouê dè chè mariâ è dè fondâ óna fameuille. P'an lè mémó drouê vi j' a vi dou mariâzô, dou tin dou mariâzô ou bîn dou divorce.
2. Le mariâzô pouî pâ êthre fé, chin lo libro é plin couchintèmin di j'èffóouc.
3. Le fameuille i'è le veretâblo fondèmin dè la société è i'a drouê à la proteichion dè la société è dè l'Etat.

Artecló dijèchat 17

1. Tota pèrchon-na ke fôche dèperliei ou bîn in comunauté i'a drouê à la propriété
2. Oun pouî pâ prindre à nioun, lo bîn chin bonna reijon.

Artecló dijèouèt 18

Tsecoun i'a lo drouê à la libèrtâ dè mójâ, dè couchieince è dè relijion ; ché drouê i'ou dere ke i'a lo drouê dè tsanjieu dè relijion ou bîn dè counvichion è la libèrtâ dè manifèstâ cha relijion è chè j'idé, cholèt ou bîn in comoun, chei in public ou in privé, pè l'insènièmin, lè prateke, lo culte è la façon dè fére lè sérémounie.

Artecló dijenouí 19

Tsecoun i'a drouê à la libèrtâ d'opinion è d'exprèchion. Chin i'ou dere ke i'a lo drouê dè pâ êthre cancanâ à cauja dè chè j'opinion è lo drouê topary dè tsercâ, dè rechèei è d'invouâ, chin parlâ dè frontire, lè jinformachion è lè j'idé pèr tui lè moyin d'exprèchion ke chè chei.

Artecló vîn 20

1. Tota pèrchon-na i'a la libèrtâ dè ch'associeu po la bonna cauja.
2. Nioun i'è th'oublia dè fére partie d'óna associachion.

Artecló vîntchi'oun 21

1. Tota pèrchon-na i'a lo drouê dè partesepâ à la dereichion di j'afère pòbleuke dè choun pa-ic, chei directamin, chei pè l'intèrmédière d'oun reprèsentan libramin choeijeic.
2. Tòte pèrchon-ne i'an lo drouê d'assèdâ, din lè coundichion d'ègalètâ, i founchion pobleke dè choun pa-ic.
3. Le volontâ dou pòplô i'è le fondèmin dè l'autorité di poei poublic ; hla volontâ dei ch'expremâ pè dè j'éleichion ónéthe ke deivouon chè tini périodicamin à la majorité di vouê chei pèr on vôtô chècrei, ou o n' âtra façon d'achourieu la libèrtâ dè vôtô.

Artecló vîntedau 22

Tota pèrchon-na, in tin kè mimbrou dè la société, pou prètindre à la sécurité sociala ; è pou aei la satisfachion d'obteni dè la société to chin ke i'a bèjoin po vivre counvenâblamin, po teni choun ran, po chè còltevâ dè manière à vouardâ tota cha deniètâ d'ómó, è fère libramin vâlic chè pròpre capacitâ. Po chin, dei pœi countâ chou l'èffô nachional è à la copèrachion intèrnachionala, in tenien countô dè l'organizachion è di moyen dè tseke pa-ic.

Artecló vîntètreu 23

1. Tota pèrchon-na ia drouê ou tra-au, dè choeiji choun tra-au, à dè coundichion jiôte è counvenâble dè tra-au, è à la proteichion countre lo chômaje.
2. Tui i'an drouê, chin difèrince, à óna pâyè pary po lo mémó tra-au.
3. Ché ke tràille i'a drouê à óna pâyè jiôsta ke li achioúriche à luic è à cha fameuille óna via counforma à la deniètâ dè l' ómó, è coumplètâye che fau pè d'âtro moyen dè proteichion sociala.
4. Tota pèrchon-na i'a lo drouê, po dèfindre chè j'interé à fondâ ou bîn dè ch'affiliyeu à dè syndica.

Artecló vîntèkatró 24

Tota pèrchon-na i'a drouê ou repoú è y pâchatin è topary à óna lemetachion reijonâbla di j'óoure dè tra-au, è dè conjé paya regóillè.

Artecló vîntsîn 25

1. Tota pèrchon-na i'a drouê à oun nivau dè via ke pouiche achiouriyeu la santé, lo benéje à luic è à cha fameuille, in chin ke counsèrne lo vivre, lè j'âillon, lo lozèmin, lè freu dè medesîn è i chervechió sociau nesésêró ; i'a drouê d'êthre achouria in ca dè chômaje, dè maladic, d'invalidètâ, dè vevâzó, dè vièilleusse ou din d'âtro ca dè pèrda dè chè moyen dè vivre, suite à dè tsauje ke dèpindon pa dè cha volontâ.
2. Le mâre è le popoun i'an drouê à êthre eijia spècialamin. Tui lè j'infan ke fóchan néhouc din oun mariâzó ou bîn in fouira dou mariâzo, deivouon aei la méma proteichion sociala.

Artecló vîntchiche 26

1. Tota pèrchon-na i'a drouê à l'edócachion. L'edócachion dei rin cothâ dou moin in chin ke counserne l'insènièmin chîmplô è lè bâje dou chaeic. Oun è th'oublia d'insènieu lè premiere bâje dou chaeic. L'insènièmin tècnic è profèchionel dei êthre jènèralijia ; l'acsè i'âte j'étude dei êthre ouvoué in plin-ne égalitâ à tuic in founchion dè lóou meretó.
2. L'edocachion dei eijieu ou plin épanouissèmin dè la pèrchon-na è ou rèspè di drouê dè l'ómó è di libèrtâ foundamentâle. Dei favorijieu la coumpréenchion, la tolerance è l'amitié intre lè nachion è tui lè groupe dè rache ou dè relijion, è topary lo dèvelopèmin di tra-au di Nachion Rèóneite po manteni la pé.
3. Ch'on lè parin ke chon lè premieu à aei lo drouê dè choeiji lo janre d'edocachion ke i'ólon bailleu à lóou j'infan.

Artecló vintèchat 27

1. Tóta pèrchon-na i'a lo drouê dè prindre pâ libramin à la via còltòrèla dè la comunauté, dè ch'implêre di beule tsauje è dè partesepâ ou progrê dè la science, è i bienfé ke chin lóou porte.
2. Lè cha-in, lè j'artiste è lè scientefecó, i'an drouê à la proteichion dè lóou j'interé morau è matérièl ke rechórton dè lóou tra-au.

Artecló vintèouèt 28

Tota pèrchon-na i'a drouê ke i'óche chou lo plan social è intèrnachional, oun ordre tel ke le drouê è le libèrtâ, ehric in la prèjinta Dèclarachion pouiche fère choun èffè.

Artecló vintenoú 29

1. Lè moundó i'an dè dèvouê in vèr la cómunauté, rin ke che le libro è plin dèvelopèmin dè cha pèrsonalitâ iè pouchibló.
2. In exersin chè drouê è in dispojin dè chè libèrtâ, tsecoun i'è choumetouc rin ke i lemetachion ètableite pè la louê, in yaua d'achioúrieu dè réconièthre è dè rèspèctâ lè drouê è lè libèrtâ di j'âtro, po chantrefère chin k'exije le morala, l'ordre poublic è le benéje jènèral in pèr ona société gouèrnâypè lo pópló.
3. Hlóou drouê è libèrtâ, porin in okoun ka ch'egzerchieu dè façon coutrère i principe è i but di Nachion Rèoneite.

Artecló trinta 30

Ocóna despoujichion dè la prèjinta Dèclarachion pouí èthre intèrprètâye comin implekin por oun Eta, oun groupèmin, ou oun individu, oun drouê dè chè levrà à óna activitâ ou bñ d'akoumpli oun acto ke vise à la destrouchion di drouê è di libèrtâ ke chon expremâ.
